

Atham iaine ul woKurunthuc 1 Atham wocittokit ammakka oPoluc pokurrinet ul wonoka'ran koKurunthuc Lon lonothon

Pul pothothilettat poIeccuo oPoluc pokurrinet ul wonoka'ran koKurunthuc atham enni, ikokat kittik ikokat noththok pAka. OPoluc pongkenet noka'ran koKurunthuc ma'ri marrothe thuput (Ngre 18) ana ul woppot wocokathe lon loIeccuo nomikit. Anaruk akka oPoluc poththet noka'ran koKurunthuc, lon lokakatheik loppot lokithak urokat iakin ithocokothe lon loMiccie than, ittina kwokurrathe enni othakka itti akwok'ro lon len.

Iatham enni oPoluc pakene tat akka lokithak itti noul iocokothe lon loMiccie itti willillako tit mungkut mungkut ima'rettaro tit (Ku'rathal 1-4). Ana kwa'rettot napilingon akka okin thokat akin okkot lon lokithak ammakka ul iommat Kapik (Ku'rathal 5-6). Kwangkene ul iocokothe lon loMiccie okkinthet oparion ana ollen ana ul woruan (Ku'rathal 7). Kwacimitto kin cakuruk itti okin thikkoik tat ammakka ul iocokothe lon loIeccuo itho'rikit thoul ia'rane apik w'rek nga'rama, ana itti okin tha'rane Kapik tothun. Kwakene kicce tat akka Kanang ikupupure kethet ton lon nuthuk loppot, ana kannan thongarot (Ku'rathal 13), akwittarot ton aron a'rane Kapik nga'rama ana ikkoik ammakka ul iocokothe lon loMiccie, ana okwarikiet kin itti akka oMiccie purokot nti ithio oron thina itti Kapik kurokieron nti ithio aron okkoik attang.

¹ Oun oPoluc ipa Kapik kakkarot itti mpathakka pul

pothothilettat poMiccie oIeccuo ammakka Kapik kongothe ana opang ponnon oCocaththanic.

² Lon elli laine ul iocckothe lon loIeccuo noka'ran koKurunthuc ana okkwion ithaik iaMiccie oIeccuo ana ithakkarakot na'ran appik akin oka thupupure ana okkwion itha'rane Ili wonnon oIeccuo nga'rama, Ili wen ana wonnon.

³ Athoporot ana thomicco nnAngappa ponnon ana Ili oIeccuo oMiccie oka nanon.

OPoluc papirane Kapik noka

⁴ Mpapirane Kapik noka appin appin nti ithoporot thung ithakkwethet non nti ilon loMiccie oIeccuo ilanon thaik tit. ⁵ Akka onon thothakkat a'rthan iaak llon ammakka itti nthere ithannere ngngin appik ana ithinaik ithanon thinaik ngngin appik. ⁶ Akka thimma lon ngkit thiin ana therene non lon loMiccie thaik icat. ⁷ Ittina onon thakorronno oka thella thethettat nuthuk thoKanang ikupupure koKapik anon thaik tha'rikot Ili wonnon oIeccuo oMiccie akwokkaprtako ntan. ⁸ Kwa'rumo nanon thonthomat puccuk anon othakkakat thella thorukwettat cik noca'ri ica Ili wonnon oIeccuo oMiccie okkaprtako ntan. ⁹ Kapik ikakkarot non annoka tothun nukul wung oIeccuo oMiccie Ili wonnon kaccot kit nolon ila kwi'ret.

Thillillakorit iul iocckothe lon loIeccuo

¹⁰ Pangkingon, mperenenon ngk'ran kolli wonnon oIeccuo oMiccie itti onon thi'r'rikarot lon tothun othakka itti anon okorronno illillakorit ana annona lon lulukku ana ona thokwarttikot cik thulukku. ¹¹ Pangkingon, opilingon nti iul woKalua thi'rethin itti onon thaik tha'rettutto. ¹² Ila mpongothe itti mpi're itti opilingon nti ianon thi're itti, "Mpamakot oPoluc" ana opilingon i're itti, "Mpamakot Apolloc" ana opilingon th'rek i're itti, "Mpamakot oPuththuruc," ana opilingon i're itti, "Mpamakot oMiccie."

¹³ OMiccie pillillakot tiri? OPoluc akkokkuttathe nothapak nti ilon loni? Onon thoccot mamuthie ngk'ran koPoluci? ¹⁴ Mpopirat noka akka mpakarrnethet opilin mamuthie nti ianon, mpethet oKkricppoc pulluk ana oKaioc, ¹⁵ Ittina pul pella ipi're itti kwoccot mamuthie ngk'ran kin. ¹⁶ Ana cakuruk mpethet ul woruan to-Iciththipanac mamuthie ana mpomma amma mpethet opilin p'rek cakuruk. ¹⁷ Akka oMiccie pokat pakorronno othiothin itti mpathethet ul mamuthie anaruk itti mpathongkene lon iloporot loleccuo, okorronno oka nthinaik nti ica thopul iponyi anaruk anina nan itti thiot thoMiccie nothapak thakarrnno urat pu'ran cik ntit.

OMiccie ook thinaik nti ica ana pu'ran poKapik

¹⁸ Akka lon loMiccie lothiot nothapak laul wella kit ken iaik wurat cik, anaruk oron itho'rettathe thakatha itti pu'ran poKapik. ¹⁹ Akka lokurrakot itti, “Mpakitto thinaik nti ica thoul i're itti winaik nti ica ana okitto nyathe're nyokkwion ithi're itti okin thinaik kannan.”

²⁰ Pul paik kartha ipinaik nti ica? Pul paik kartha ipangkene lon lothonce'ret lon cik? Kapik kothikkiet thinaik nti ica thonocapu ncik appik thommaik. ²¹ Ana Kapik nthinaik nti ica thung kimmat itti capu ncik appik cakarrnninak nthinaik thopul iponyi, ko'rekathe ul appik ioccoke lon nthongkene thin ithakorronno oka thonthomat. ²² Ul woIouth wongothe itti okin thimma lon ilommaththik loKapik ana ul iannoka woIouth wakariccat lon lothinaik ntica ²³ anaruk onin thangkene lon lothiot tholeccuo nothapak, thongkene then thonthomat noul woIouth ana ul iakorronno oka woIouth wokatha itti thongkene then thellat lon cik. ²⁴ Anaruk okkwion

ithaKapik kakkarot ammakka ul woLouth ana ul iakorronno oka woLouth thina itti oMiccie pu'ran poKapik ana thinaik nti ica thoKapik. ²⁵ Akka thommaik thoKapik thathinaik nothinaik thopul, ana thomma lon thung thonthomat nathopul iponyi.

²⁶ Pangkingon nokwarttikot itti onon thokat tat ca'ri ica Kapik kakkarot non. Oplingon thotteik nti ianon thokat thinaik nti ima nocapu ncik appik, ana okin thotteik nti ianon thonat pu'ran ana okin thotteik nti ianon thokwontat thaa'rthan. ²⁷ Anaruk Kapik kummot a'rupu iommaik wonocapu ncik appik akothie ul cik ngngin inaik nti ima ana kummot a'rupu wonocapu ncik appik iakannoka wonthomat akothie ul cik ngngin ionthomat. ²⁸ Kapik kummot lon ilaul wella lon len ana wopa'rinet cik nocapu ncik appik, ana a'rupu iellaik, othakka itti akokitto a'rupu iaul okatha itti ien akkoporot. ²⁹ Kapik kokkothe lon elli apul ella ipipot ka thoura tokit kung. ³⁰ Ana elli akka onon thokanet iaMiccie oleccuo ook ipothakkanet ton thinaik ntica thoKapik ana thoporot tokit koKapik ana thupupure ana thelikkako thonnon. ³¹ Ilen akka lokurrakinet iatham woKapik itti, “okkwi ipongothe itti kwipot ka thoura akwokkot, akwipot ka thoura Ili oleccuo ngngin.”

2

Theret lon lothiot thoMiccie nothapak

¹ Pangkingon, akka mpainet non mpakarrnaine non othakka itti anokenenon itti mpinaik nti ica, mpaththere-nenon lon loKapik. ² Akka mpappongothe itti mpammat lon l'rek akka mpokat itho'rküt thon aneret lon loleccuo oMiccie pulluk ipiothe nothapak. ³ Mpainet non ampothiat cik ana amponu n're ana anokkwe ka. ⁴ Lon lin

ana thongkene thin thokat thakannoka thothinaik nti ica ana mpellat lon lopeththere anaruk mpokat pittarakothe mpu'ran poKanang ikupupure koKapik, ⁵ othakka itti athocokot lon loKapik nomikit thon okorronno oka nolon lothinaik nti ica thopul iponyi anaruk nopu'ran poKapik.

Thinaik nti ica noKanang koKapik

⁶ Onin theret lon lothinaik nti ica iul ina lon loKapik kicce anaruk okorronno oka thinaik nti ica tholuput elli ana manna okorronno oka thonili enni inamattat. ⁷ Anaruk onin theret thinaik nti ica thoKapik ithamu'rut-takot ncik itha Kapik konekkenthet thrük thonnon cik aca'ri carthuk oku'rtta ncik. ⁸ Pul pella nti inili noluput elli pinat, akka amma okin thaththina okin thakorronno okkwothe Ili wothrik thonnon nothapak. ⁹ Anaruk ammakka lokurrakot itti, “Pul pella ipimmat

ana kunu kella ikaccikotho,
ana ngath're ngella iokat nginat
ilaKapik konekkinthet okkwion cik ithongothe lon lung.”

¹⁰ Anaruk Kapik kokenet ton nan ngKanang kung.

Kanang ikupupure kakwariccat cik ia'rupu appik ana manna ciki icarak ca'rupu woKapik.

¹¹ Oththa nti iul akkina thokwarttikot cik thopul p'rek? kanang kung kulluk akkina ikaik iaak. Ana menik cakuruk pul pella ipina thokwarttikot cik thoKapik, Kanang koKapik kulluk akkina. ¹² Oron thakorronnoocco Kanang konocapu ncik appik anaruk oron thoccot Kanang noKapik othakka itti aron ina lon ilaKapik ketthet ton nuthuk. ¹³ Ilen elli akka onin ere, okorronno oka lon ilongkenettat nin nthinaik nti ica thopul iponyi anaruk llon ilongkenettat nin ngKanang koKapik. Onin

theret lon ilaik icat llon loKanang koKapik. ¹⁴ Pul ipella Kanang koKapik pakarrnnangkot lon loKanang koKapik ilao noKapik akka lon len localang naak ana kwakarrnnina akka lon len linako itti loKanang koKapik. ¹⁵ Pul iponu Kanang koKapik pakkma lon ncik appik anaruk pakorronno akkmako nul ook akkwonu lon lothakkma ikkun. ¹⁶ “Oththa akkina thokwarttikot cik tholli othakka itti akwocimittok?” Anaruk oron thouu ngath're ngoMiccie.

3

Thillillakorit thoul ioccoothe lon loIeccuo

¹ Pangkingon, mpakorronno erenenon ammakka ul ionu Kanang koKapik anaruk ammakka ul wonocapu akka onon tharthuk thanyukul nyarran ilon loMiccie. ² Mpethet non ngui, okorronno oka thu'rit ithonthomat akka onon thakorronno okuccekot cik itti onon tha'rko thu'rit ithonthomat, ³ onon tharthuk thaik ilon lonocapu. Ana inakka onon thanyirane ana a'rettakot, elli lakene itti onon thaik ilon lonocapu ana okkot lon loul ionyi wonocapui? ⁴ Akka amma opilin i're itti “Mpamakot oPoluc, ana opilin itti mpamakot Apolloc,” Onon thakorronno oka ul nuthuki?

⁵ Nantokorronno elli appik, Apolloc oththa? Ana oPoluc oththa? Okin thakorronno oka ul iarekine Kapiki, ana okin ithokorronnot non anocokot lon loKapik ammakka Ili wikkethekin ngre ngen kurekkurek itti okin thakkot. ⁶ Mpoçikkarot pira ana Apolloc pikikkiet ng'ri anaruk Kapik akkocokkiet. ⁷ Ittina lakorronno oka itti okkwen akkoçikkarot ana manna itti okkwen akkikikkiet ng'ri, anaruk Kapik kulluk akkacokkie a'rupu ncik appik. ⁸ Pul ipaçikkarot pira ana pul ipikikkie ng'ri, okin thouu lon lulukku ana okin thiot lon iloporot kurekkurek nti ilon

ilakin thokkothe. ⁹ Akka onin ul iarekine Kapik ana onon kopon koKapik ana kman koKapik.

¹⁰ Nthoporot ithaKapik kethin, mpokkothe millang ammakka pul ipina uno ana opilin paik puno nan. Anaruk okkwi ipuno nan ponu itti kwa'rumoik papenang itti kuno tat. ¹¹ Pul pella ipanekket millang m'rek prek no'ra womillang imonekkettatheik. Kapik konekkethe oIeccuo oMiccie cillang culluk cen ana pul pella papponekket cillang c'rek cik. ¹² Ana amma pul p'rek punothe nomillang emmi puno mmallong imallio ana nthaa ana mothok imonu cekerek coppot ana o'ren ana ucce, ¹³ ngre ngung nginako nan itti ngarat akka noca'ri ica aMiccie anthan nan ngimmako attattar. Ngre nginako nan nthik ere amma thaap thok'rettat nthik athantinako ana ngre ngoul ngakathaccetta tit kurekkurek kicce. ¹⁴ Amma man ima akkwi punot mo'rungkotheik, kwakketta ntit. ¹⁵ Amma man mok'rot ana kuret a'rupu cik appik anaruk kwa'ret ka kung ammakka pul ipokkot cik nti ithik.

¹⁶ Onon appik thomma itti onon tupan toKapiki ana Kanang koKapik kaik ianoni? ¹⁷ Amma opilin pokittot tupan toKapik ana Kapik kakittok akka tupan toKapik tupupure ana onon tharupan toKapik ten.

¹⁸ Nokorronno ammikkot ka kon. Amma opilin nti ianon paik pame itti kwinaik nti ica na'rupu wonocapu enci, kwonu itti kwaka pommaik othakka itti akwinaik nti ica. ¹⁹ Akka thinaik nti ica thonocapu thaththommaik tokit kung. Ammakka lokurrakot itti, "Kapik kina thinaik nti ica then amma okin okkot ngre ngen." ²⁰ ana attang "Ili wina itti thokwarttikot cik thopul ipinaik thella lon cik." ²¹ Ittina nokorronno ipot ka thoura kopul iponyi. Lon appik lon, ²² oPoluc ana Apolloc ana oPoththuruc ana

capu ncik appik ana thikkoik ana thio ana manna inenni ana ngorrot, lon appik lon ²³ ana onon ul woMiccie ana oMiccie poKapik.

4

Ul wothothilettat woMiccie

¹ Ittina onon nthonu itti nthakatha nïn ammakka ul iarekine oMiccie ana ul iangkene lon loKapik ila amu'ruttakot ncik. ² Ana inenni laik itti okkwion ithonekkettathe cikiit nan itti okin thakkot ngre, okin nthonu itti nthakene itti okin tho'rumot nore ncikiit cullukku. ³ Mpella kit koka kin amma onon thakkmarin ana manna ul ionyi akkakkmarin, mpakarrnakkma manna ka kin. ⁴ Lon lin ila mpongothe itti mpakkot linako nan attattar ana lakorronno okene itti mpella lon ilokithak. Ili akkakkman. ⁵ Ittina kirrnni akkma pul p'rek aca'ri carthuk anthan cothakkmako, oco'ri puccuk alli akkakat. Kwakene lon ncik appik ilokat lorukot ncik ana kwakene lon ilaik nomikiit moul appik. Noca'ri cen ul wapirietta noka kurekkurek nti ilon ilakin thokkothe.

⁶ Pangkingon, inenni nthokkothe lon elli cittokit ngka kin, oun ana Apolloc, othakka itti annina lon naniin papenang ili're itti "Kirrnni arrot lon ilokurrakat." Mpongothe itti nthakarrnni'ret ul itti opilin ntianin poporot napilin. ⁷ Ngintha akkakorronnong aka pellek noul w'rek? Ngintha akka ngkwonu ipa ngkwakarrnnettatt? Ana amma ngkwoccot ngkwontha akka akkot ere ngkwarrnocco?

⁸ Onon thame itti onon thonu ila nthongothe appiki? onon thame itti onon thothakkat a'rthani? onon thame itti onon thothakkat nili ana manna oniin thakorronno othakkai? ana mpongothe itti onon thaakat nili icaricat othakka itti aron oka nili uraththungon. ⁹ Akka mpakatha itti Kapik kothikkiet nin ul wothothilettat iacothot ncik

ere ul iaik wathillat noka'ran koul appik athongutta. Onin thothikkiettat ul iaul okathacce ana u'rupa wothothiletat woKapik. ¹⁰ Onon thame itti onon thina lon loMiccie anaruk onin akkomma lon loMiccie, onon thame itti onin thommangka anaruk onon akkopo'rot than, onon thame itti onon thathiakine cik ana onin thakorrno othiakine cik. ¹¹ Ana manna inenni onin thiamat ana pica paik pakkwot nin ana onin thakot eret willillakot ana onin thaik thakkiettat thiak, onin thella kaman nanin ikkoik. ¹² Onin thareko kannan nyaun nyin. Amma onin thattattakot anin i're lon ilethiئتot cik, amma onin occokkiettat thiak anin occokot cikit ilon len, ¹³ amma onin thokithiئتat llon anin othiئت lon tit ella pu'ran. Ana inenni onin thothakkat ere ngarang ngonocapu ncik appik ana ka'ran ikuntat ngarang nan.

¹⁴ Mpaik pakorronno okurrinenon elli othakka itti anothie non cik anaruk anocimitto non karkko nyukul nyin inya mpongothe. ¹⁵ Akka manna onon thantona ul athar attul iangkenenon, onon thella oththen thopot akka nti ilon loMiccie mpothakkat oththe pon llon loIeccuo iloporot. ¹⁶ Ittina mpaik pa'retto nanon itti onon thamakot lon lin. ¹⁷ Ntilon elli mpaik pathinthe non oThimiththaoc ukul win ipa mpongothe ipo'rumot nolon lolli. Kwakwarikiet non kathar kothikkoik thin iaMiccie oIeccuo ika mpaik pangkene na'ran appik ionu ul ioccoothe lon loIeccuo.

¹⁸ Opilingon thaik thipot ka thura ere mpakarrnnaine non. ¹⁹ Anaruk mpaine non noma'ri motte, amma Ili oIeccuo akkongothe ana mpiot lon ila ul waik wipinthe ka thoura ngngin ana pu'ran ipa akin thonu. ²⁰ Akka ngili ngoKapik ngakorronno oka lon ileretta anaruk pu'ran. ²¹ Ngintha akka onon thongothe? Mpainenon mpuai? Mpainenon nthongarori ana ngKanang ikoporori?

5

Tha'raro ngngin iul ioccokothe lon loIeccuo

¹ Lon lainin itti opilingon nti ianon thaik tha'raro ngngin iul ioccokothe lon loIeccuo ana okin thaik thakkot ngkathar ika ul iakorronno occokot lon loIeccuo wakorronno okkot. Mpocckithe itti pul p'rek pa'rot pari poththan ngngin. ² Ana onon thaik thipot ka thoura llon len, nthakorronno ua ka kopul ipokkothe lon leni, annopa'rekathok cik nti itho'rküt thoni? ³ Antoka manna itti mpella nanon ngka kin anaruk unthaik urathtut ngKanang koKapik. Ana nti ilon len ilokkattathe, mpakmat pul ipokkothe lon len ntit ere mpokat cik urathtut. ⁴ Ana amma onon tha'rntakothe ithun ngk'ran kolli oleccuo ana oron thaka urathtut ngKanang koKapik ana pu'ran polli wonnon oleccuo pakaik. ⁵ Nethet pul pen ul pul pothopolut ikkun othakka itti aka kopul iponyi okittako ana akanang kung o'rettat noca'ri icalli anthan nan.

⁶ Thipot ka thoura thon thakorronno oka thoporot. Onon thomma itti lon ilokithak lotteik lappaththat cik appik ere mü'rükül amma aminyie m'rei? ⁷ Nopa'rine lon cik ilipe ilokithak ilikkoik ere mü'rükül iminyie a'rupu annocokot lon ilie ilikkoik ere arakith iella mü'rükül tit. Akka oMiccie ipokkuttanthe ton nothapak pathungkat thonnon thokamuthe koThaurrot kman k'rek cik. ⁸ Ittina ton okkot kamuthe kothaurrot kman k'rek cik okorronno oka llon ilipe ilikkoik ere mü'rükül imalon ilokithak, anaruk narrakith iella mü'rükül wolon iloco'rotheik ana ilaik icat.

⁹ Mpokurrinet non lon ika'ramacak kin itti onon thakorronno ikkoik ithun nul ia'raro ngngin. ¹⁰ Mpaik pakarrneret ul wonocapu appik, mpaik peret ul ia'raro ngngin ana ionu thrük nan ana iammikkot ana ia'rane kikkilan nga'rama. Akka amma mpokat aneret ul wonocapu ncik

ana onon thaapa'rinet capu cik enci. ¹¹ Anaruk inenni mpaik pakurrinenon itti onon thakorrno ikkoik ithun nul i're itti okin opangkangon ilon loIeccuo anaruk akin thaik akin a'ro nul nuthuk ana ona thr'ik nan ana a'rane kikkilan nga'rama ana erettot ana okin itha ngapak ongwo ana ammikkot. Nokorronno o'rkoik manna anaththungon.

¹² Ngintha akka anakkmene ul iakorronno occokot lon loIeccuo? Onon thakorrno akkma ul iocckothe lon loIeccuoi? ¹³ Kapik kakkma okkwion ithaik thapat. "Nopettot ul cik wolon ilokithak nti itho'rkit thon."

6

Ul iocckothe lon loIeccuo

¹ Amma opilin nti ianon pa'rettot okin opang ipakin thaik ilon loIeccuo, ngintha akka akwonekinthet lon len tokit koul iakannocokot lon loIeccuo, kwira panekot tokit koul iupupure woKapik? ² Onon thomma itti ul iupupure woKapik wakkma lon lonocapu ncik appiki? Ana amma ngkwakkma capu ncik appik, ngkwakorronno akkma lon ilottolotteiki? ³ Onon thomma itti oron ithocckothe lon loIeccuo thathakkma u'rupa wothothilettat woKapiki? Ittina oron thak'ro lon ilaik appinappin.

⁴ Ana amma onon thaik tha'rettot nolon ammakka elli, nthanekine ul iellakot kit ken tokit koul iocckothe lon loIeccuo akaintha? ⁵ Mpi'ret elli othakka itti anothienon cik. Pul p'rek pella ianon pinaik nti ica pak'ro lon ilaik moloko iul iocckothe lon loIeccuoi? ⁶ Anaruk opilin nti iul iocckothe lon loIeccuo panekine opang ul w'rek akwoththe noul iakin thocckothe lon loIeccuo aththuri?

⁷ Lon ilaik icat itti onon thonul ul iannekine ul w'rek lon ianon ana elli lakene itti onon thalkakothet kirkkir. Ngintha akka anon okorronno akkmakine? Ngintha

akka onon okorronno ammikkakinthet? ⁸ Anaruk onon ngkakon thaik thakkinthet opangkangon lon moloko ana ammikkarot.

⁹ Onon thomma itti ul iakkot lon ilokithak wakorronno opakkot nongili ngoKapiki? Nokorronno ammikkakot manna llon lotha'raro ngngin ana nul ia'rane a'rupu worikkillan nga'rama ana ul ia'ro nul nuthuk ana llon lolomo're ¹⁰ ana thu'ran ana thrik nan ana thokkwarot thoungkak ana therettot ana thammikkarot elli lakorronno opakkiettot nongili ngoKapik. ¹¹ Opilingon nti ianon thokat akin okkot ittina. Anaruk onon thothikkiet-tat thoporot nti ilon ilokithak, onon thothakkat thoKapik, nthopakkothe iku'ri ngKapik ngk'ran kolli oleccuo oMiccie ana mpu'ran poKanang koKapik konnon.

Tha'raro ngngin

¹² Opilin pi're nti ianon itti, “Lon lella ilalkothin mpakkot lon ncik appik ila mpongothe,” anaruk lon ilakkot appik lakannoka loporot appik. “Lon lella ilalkothin mpakkot lon ncik appik ila mpongothe,” anaruk mpakannangkot itti mpaka piak popap'rek. ¹³ “Thu'rit thokkattanthet carak ana carak cothu'rit,” anaruk Kapik kakittokin aththuththe'ra. Ka kakannoka itti ka'rako ngngin nuthuk anaruk kolli ana Ili woka. ¹⁴ Kapik kurokiet Ili oleccuo nti ithio mpu'ran pung ana kurokieron nti ithio cakuruk mpu'ran pung. ¹⁵ Onon thomma itti ka kon kulukku ngka koMicciei? loporot itti mpaneko ka nnoka koMiccie anethet pul ipa'ro nul nuthuki? A a a lakannoka menik kirrkkir. ¹⁶ Onon thomma itti okkwi ipethet ka kung pul ipa'ro nul nuthuk pakin thulukku okin aththuri? Akka li'rettat itti “Okin aththuththe'ra thathakka ka kulukku.” ¹⁷ Anaruk okkwi ipethet Ili ka kung okin thulukku iKanang ikupupure.

¹⁸ Nopa'rine lon lotha'raro ngngin nuthuk. Lon ilokithak appik l'rek ila pul okkot lella lon noka kung anaruk lon lotha'ro nul nuthuk lathikkie ka kung kokithak. ¹⁹ Onon thomma itti ka kon karupan toKanang ikupupurei ikaik iaungi ika ngkwocot noKapiki? Ngkwannoka ngka kang pellek anaruk onon thoKapik, ²⁰ nthokettat ncekerek. Ittina nothiane Kapik cik ngka kon.

7

Thiipa

¹ Ana nolon ilanon thipittothin lothiipa, mpi'ret non itti laka loporot itti pul pakinnipo. ² Anaruk inakka lon lotha'raro ngngin loppaththatheik, loporot itti pul pana pari pung ana pul ipopari ona olle pung. ³ Pul ipocura ponu itti pa'ro opari ngngin ana opari menik cakuruk. ⁴ Ka kopul ipopari kakorronno oka kung pellek anaruk kolle pung cakuruk. Ana menik cakuruk, ka kopul ipocura kakannoka kung pellek anaruk kopari pung cakuruk. ⁵ Nokorronno oco'ro nti itha'ro onon ithittettot anaruk noco'ro amma onon akkerethe itti onon thaco'ro ma'ri motte anna'ra nga'rama. Nopakkarot nan ammakka nthokat othakka itti apul pothopolut okorronno ennekke non akka nthomma occokot ka kon. ⁶ Mpi'ret lon elli mponu itti mpi'ret non okorronno oka lon ilonthomat. ⁷ Mpongothe itti ul iomura waakat ammakka oun. Anaruk Kapik kikkethe ul lon nuthuk kurekkurek, opilin ponu elli ana opilin ponu ell're.

⁸ Ana mpi'ret ul iakirrnnipo ana iakirrnnitta ana ul iamuruma itti okin thikkoik nuthuk okorronno itta ana okorronno ipo ammakka oun. ⁹ Anaruk amma okin thakorrno occokot ka ken, akin itta ana ipo akka laka

loporot itti okin thipo ana itta nothikkoik akin ongk'rikko nthiak.

¹⁰ Mpi'ret ul ittat ana ipot lon elli akin occot kit nan (okorronno oka oun anaruk Ili oIeccuo) Itti pul ipopari ipittat ponu itti pakorronno oththe nalle. ¹¹ Anaruk amma pukkot nalle ponu itti pikkoik nuthuk, ana amma pakarrnangkot itti pikkoik nuthuk ana ponu itti pakkinthet olle. Ana olle ponu itti kwakorrno othio pari cakuruk.

¹² Elli lani'ret opilingon th'rek (oun akki'ret okorronno oka Ili oIeccuo) itti, amma opilin pipot pari ipakorronno occokot lon loKapik ana pari pongothe itti okin thikkoik akin aththe'ra, akwokorronno othio. ¹³ Ana amma pul ipopari ponu olle pakorronno occokot lon loIeccuo ana olle pongothe itti okin thikkoik akin aththe'ra akwokorronno othio. ¹⁴ Akka olle popul ipopari ipakorronno occokot lon loIeccuo, pothakkat pupupure nti iapari ipoccoke the lon loIeccuo ana opari ipittat ipakorronno occokot lon loIeccuo pothakkat pupupure nti ialle ipoccoke the lon loIeccuo. Akka amma okarrnoka ittina nyukul nyen nyathakka ere nyukul nyoul iakorronnocokot lon loKapik anaruk ittina Kapik kongothekin.

¹⁵ Anaruk amma pul pakorronno occokot lon loIeccuo ana pongothe itti pathio opari akwothio. Ana amma pul ipopari pakorronno occokot lon loIeccuo ana pongothe itti pathio olle, akwothio. Pul ipoccoke the lon loIeccuo pakorronno oka ponu itti pikkoik ittina, akka Kapik kakkarot ton itti oron thikkoik thoporot ana thopirat noka. ¹⁶ Pul ipopari, ngkwina taththa itti ngkwa'ret olle pang? Ana manna pul ipocura, ngkwina taththa itti ngkwa'ret opari pang?

Ikkik thikkoik ithaKapik kakkarothung

¹⁷ Nikkoik ngkathar ika Ili wethet non itti onon thikkoik ngngin ana ika Kapik kakkarothernon. Lon lothonce'ret lon cik elli lanonekkenthet ul iocokothe lon loIeccuo cik na'ran appik. ¹⁸ Amma Kapik kakkarot pul appokekkothe apokorronno appopa're thokekkot cik. Ana amma Kapik kakkarot pul apokorronno appokekkot. ¹⁹ Akka okekkot ana okorronno okekkot thella lon cik. Thocckot lon loKapik akkaporot nolon appik. ²⁰ No'rungkwot cik ammakka onon thokat noca'ri ica Kapik kakkarot non. ²¹ Amma ngkwokat piak akka Kapik kakkarorong, kir-rnni opellene lon len. Ana amma ngkwiothe kathar ika apa'rine thoka piak cik, apa'rine cik. ²² Akka okkwi ipokat piak akka Ili oIeccuo wakkarorok kwothakkat pul polli oIeccuo ipelikkakat ana menik cakuruk okkwi ipokat pakorronno oka piak akka kwakkarakot, kwothakkat piak poMiccie. ²³ Kapik kokerot non ncekerek crik ana ittina nokorronno othakka iak woul ionyi. ²⁴ Pangkingon, onon thonu itti ntharungkot ilon loKapik ammakka onon thokat cik noca'ri ica Kapik kakkarot non.

²⁵ Anaruk mpella lon nolli oIeccuo ila anerene nyukul inyoire, anaruk mpi'ret kin lon lin karkkopul ipalli oIeccuo ponekkethe cikit nan. ²⁶ Ana nti ilon ilaik inenni, mpakatha itti loporot itti onon tha'rungkwot ammakka onon thaik. ²⁷ Ngkwipori? Amma ngkwipot akorronno i're itti ngkwathio pari. Ana amma ngkwakirnnipo akorronno okwariccat pari itti ngkwipo. ²⁸ Anaruk amma ngkwipot, ngwakorronno okkot lon ilokithak ana amma ukul ioi're wittat wakorronno okkot lon ilokithak. Anaruk okkwion ithipot ana ithittat thiot lon ilammaket kin lop-pot nothikkoik then appik. Ana mpongothe itti mpa'ret non nti ilon len.

²⁹ Pangkingon, lon ilampongothe itti mpi're itti ca'ri cakko napuththut ana nciki inenni okkwion ithipot ari

thonu itti nthaka ere okin thakarrnipo. ³⁰ Ana okkwion ithaik ithmeru akin oka ere okin thella ithmeru ana okkwion ithopirat noka akin oka ere okin thakorronno opira noka ana okkwion ithokerot a'rupu ere okin thakorronno okero a'rupu wen. ³¹ Ana okkwion ithongothe a'rupu wonocapu ncik appik akin oka ere okin th'rat akka lon lonocapu appik lintat cik.

³² Mpongothe itti onon thella n're nothikkoik thon. Pul ipakirrnipo pakwantot kathar ikakwopirie Ili oIeccuo ngngin noka. ³³ Anaruk pul ipipot ponu n're nothikkoik thung ana ngre iakkwonu ana a'rupu wonocapu appik ana tat akka akwopirie opari noka, ³⁴ ana ittina kwonu lon le'rarit. Pul ipakirrnitta ana manna ukul ioi're wakwantot kathar ika akwokatha lon lolli oIeccuo ngngin tulluk ana ethet Ili oIeccuo cikit ana kanang kothikkoik kung. Anaruk pul ipittat ponu kit nolon lonocapu appik ana tat akka akwopirie olle noka. ³⁵ Mpaik perenenon lon elli othakka itti annikkoik thoporot ana okorronno oka itti mpaik panemot non nolon anaruk othakka itti annikkoik ngkathar ikoporot ana kulukku ikaine Ili oIeccuo tulluk.

³⁶ Amma okkwi ipaththiot itti nthakorronno oka thoporot okin okkul iakwonomothe itti kwipo ana luput laik laeo, akwipo aththaman ammakka kwongothe. Ittina kwakorronno okkot lon ilokithak ana okin thonu itti okin thittetto. ³⁷ Anaruk pul ipok'rot lon lung pellek ana pi'ret itti pakirrnipo ana po'rumot noka kung ana kwi'ret itti kwakirrnipo ukul ioi're, kwokkothe iloporot. ³⁸ Ana ittina okkwi ipipo ukul ioi're kwokkothe iloporot anaruk okkwi ipakarrnipo ukul ioi're wen pokkothe iloco'rotheik kannan.

³⁹ Pul ipopari ponu itti paka nalle tulluk ipa kwipot nothikkoik then. Anaruk amma olle piot, kwonu itti kwipo p're p'rek amma kwongothe anaruk ponu itti paka

pul poIli oIeccuo. ⁴⁰ Nolon lin, mpi're itti, pul ipopari pen pikkoik popirat noka amma po'rungkothe nuthuk okorronno itta attang, ana mpakatha cakuruk itti Kanang koKapik kaik naun akka anere lon elli.

8

Kapa kopapu ipokkuttanthe't 'ran

¹ Mpongothe itti mperet kapa kopapu ipokkuttanthe't 'ran. Oron thina kicce itti, oron appik thonu lon laron thina. Thinaik thipiet ton kathoura anaruk thongat thapo'rieron than. ² Pul ipi're itti pina lon ncik appik parthuk pomma lon l'rek ana ngkwomma itti kwina lon nngin.

³ Anaruk pul ipongothe Kapik paKapik kina.

⁴ Ana nolon lotho'rko kapa kopapu ipokkuttanthe't 'ran, oron thina kicce itti 'ran wella lon cik kirrkkir nocapu appik anaruk Kapik kulukku tulluk. ⁵ Amma manna 'ran ana a'rupu worikkillan wantokaik, tothi'rot ana nocapu (ana icat 'ran ana a'rupu worikkilan waik woppot ana nili noppot), ⁶ anaruk icci naron Kapik kulukku Ongappa okkwi ipoku'ret a'rupu ncik appik ana okkwi iparon thokkot cik aron orekine, ana Ili waik wulukku ana ook Ili oIeccuo oMiccie ipoku'ret a'rupu ncik appik ana okkwi iparon thokkot cik aron orekine.

⁷ Anaruk ul appik womma lon elli. Ul w'rek wonu ima men itti 'ran ana a'rupu worikkillan waik icat ana ittina amma okin o'rko kapa kopapu ipokkuttanthe't 'ran, akin okatha ere lon len lo'ran ana akka mikit men momma lon, okin thakatha lon la'rupu wornikkilan laik icat. ⁸ Anaruk thu'rit thakorronnonekot ton iccik koKapik, oron thakorronno oka thokithak amma oron thakorronno o'rko ana oron thakorronno oka thoporot amma oron tho'rkot.

⁹ No'rumo nothikkoik thon ithanon thaik ella n're. Nokorronno okorronno thikkoik thon itti thalikine opangkangon cik itharthuk thie ilon loIeccuo. ¹⁰ Akka amma okin itharthuk thie ilon loIeccuo thimmat non ithina lon lo'ran anno'rkoik norupan to'ran ana a'rupu worinikkillan, okin thakorrrno o'rko kapa ka'rupu iokkuttanhet 'ran cakuruki? ¹¹ Ittina opangkang pen ipie ithocokot lon loIeccuo ana ipa Miccie piinet pokittakot nthinaik thang. ¹² Amma akkinthet opangkangon lon ilokithak ngkathar engki, ana ipiekin ñnyĩ noucce, ngkwaik pakkot lon ilokithak naMiccie. ¹³ Ittina amma kapa ika ano'rko kakorronno apangkingon okkot lon ilokithak, mpakorronno o'rko, othakka itti anokorronno apiet kin ilon ilokithak.

9

Lon ila pul pothothilettat okkot ana ilakkattanthok

¹ Mpakorronno oka itti mpakkot lon ella n'rei? Mpakorronno oka pul pothothilettat poIeccuoi? Mpakirrn-nimma oIeccuo Ili wonnoni? Onon thakorrrno okaik inenni nti ire iamporekinet Ilii? ² Antoka manna itti mpakorronnokane opilingon pul pothothilettat, anaruk mpina kicce itti mpapul pothothilettat nanon. Akka onon akkakene itti mpokat pul pothothilettat ire ngoIli.

³ Lon lin elli ilanorrot noka kin ngngin nakkwion ithaik noka'ran kothakkma itti okin thakkman lon lin. ⁴ Lon lakorronno oka loco'rotheik itti oron tha'rkoik ana ikko a'rupu w'reki? ⁵ Lon lakorronno oka loco'rotheik itti ari wopang ponnongon ithocokothe lon loIeccuo wamakot toni? Ammakka ul wothothilettat w'rek ana opangon tholli ana oPoththuruci? ⁶ Oun ana oParnapa tulluk akkonu itti onin thareko anin ittarot ka kini?

⁷ Oththa akkareko pul ippro ana akwethet ka kung akucci? Oththa akkara mil akwokorronno o'rko? Oththa

aku're a'rupu worua ana akwokorronno ikko ngui ngen?
⁸ Nthapri mpaik pere lon elli pellek ngka kini? Lon lothonce'ret lon cik laik lakorrno ere menik cakuruki?
⁹ Akka lokurrakot iatham wothence'ret lon cik loMucca itti, “Kirnni i'riko ngura thon amma acukkwarriet mil cik itti amopura.” Nthapri Kapik kaik keret ngurai? ¹⁰ Kapik kaik kereneron lon elli okorronno oka ittinai? İcat, elli lokat lokurrakinet ton, akka pul ipara mil ana ipi're mil pi're okin thongothe itti okin thacco a'rupu w'rek ntit.
¹¹ Amma onin therenet non lon loKanang ikupupure, laka lonthomat itti onin thiot thu'rit ana a'rupu w'rek nanoni?
¹² Ana amma opilingon thonu itti onon thittarakot kin ana onin thakorrno oka thonu itti onin thittarakot cannani?
 Anaruk onin thakorronno ipitto lon len. Onin thoc-cokothe cikit ilon appik othakka itti alon iloporot loMiccie okorronno olikakineik. ¹³ Onon thomma itti okkwion ithareko noppa toKapik tha'rko thu'rit noppa toKapiki? Ana okkwion ithareko noru'rot ta'rama tothok'ret a'rupu wothokiot ngüccük cik tha'rko na'rupu iakin ethet Kapik noru'rot ta'ramai? ¹⁴ Menik cakuruk ili wi'ret itti, okkwion ithangkene lon iloporot loIeccuo thonu itti okin thacco a'rupu w'rek ilon ilakin thaik thangkene iloporot loIeccuo. ¹⁵ Anaruk mpella lon len ana manna mpaik pakorronno okurrine non itti onon thakkinthin lon len. Mpangat itti mpio amma mpakinnipot ka thoura nothangkene thin okorronnoocco pap'rek ntit. ¹⁶ Ana icci amma anongkene lon iloporot loIeccuo, mponu itti mpakinnipot ka thoura, akka mponu itti mpangkene lon iloporot loIeccuo. Ana angkre amma mpakorronno ongekene lon iloporot loIeccuo. ¹⁷ Ana amma anongkene nuthuk, mpakketta anaruk mpaik pakkot ammakka ngre iaKapik kethin itti mpakkot. ¹⁸ Ittina mpakketta ngintha? Ithen itti, amma anongkene

lon iloporot loleccuo mponu itti mpangkene nuthuk okorronno oka itti mpakketta ntit. Ittina mpakirnnipitto pap'rek akka mpokat anongkene lon iloporot loleccuo.

¹⁹ Antoka manna itti mpaik nuthuk pakorronno oka piak popul p'rek, anaruk mpathikkie ka kin piak poul appik othakka itti anina akka anonane oMiccie ul woppot. ²⁰ Mpothakkanet ul woIouth karkko pul poIouth anina akka anonane oMiccie ul woIouth woppot. Ana okkwion ithaik ilon lothonce'ret lon cik loMucca anaruk mpakorronno oka ilon lothonce'ret lon cik loMucca othakka itti anonane kin oMiccie. ²¹ Mpothakkanet ul iella lon lothonce'ret lon cik ere pul ipella lon lothonce'ret lon cik (antoka manna itti mponu itti mpaccot kit nolon lothonce'ret lon cik loKapik anaruk kannan lon lothonce'ret lon cik loMiccie) othakka itti anonane oMiccie akkwion ithella lon lothonce'ret lon cik. ²² Mpothakkanet ul iie ithocokot lon loleccuo ere pul ipie ilon loleccuo othakka itti okkwion itharthuk thian ilon loleccuo ainin. Mpothakkanet ul lon ncik appik othakka itti ano'ret opilingon. ²³ Mpaik pakkot elli appik nti ilon iloporot loleccuo othakka itti aniot thethietta tholon len.

²⁴ Onon thomma itti ithulantarane, ul wallo appik anaruk okkulukku akkuro ul appik akwoccat papu pothularrtarnei? Ittina, nollo annocco papu pothularrttarrne nngin.

²⁵ Ul appik iularrtarrne wonu itti wangkenetta kicce kathar kothollo. Okin thakkot ittina othakka itti akinocco papu pothularrttarrne anaruk nthaik thakkot ittina aron ako cupul icakorrno intat cik thuputthuput. ²⁶ Ittina mpakorronno ollo ere pul ipella lon cik ana mpakorronno othatto nuthuk ere pul ipathatto ikanang nuthuk. ²⁷ A a mpakkwe ka kin ana anothikkie piak pin othakka itti amma mpocothothe thongkene ul w'rek anokorronno opa'rettaik nopapu pothularrttarrne.

10

Nokorronno a'rane a'rupu worikkillan nga'rama

¹ Pangkingon, mpongothe itti mpakwarikiet non lon ilaik icat itti thiki thonnon thokat iprenek ponuththe anuththe angwot kin ana okin tharrathe tok irapangka cik irocot k'ran itti tok iro're. ² Elli lokat cik ere okin thocot mamuthie ntharrot tok irapangka ana onyaro inuthe akin othakkakat ul iammakothok. ³ Okin tho'rkot thu'rit thoKanang ikupupure thulukku ⁴ ana ikko ng'ri ngoKanang koKapik. Okin thikkot ng'ri nti ikancang ikupupure ikangwothekin ana kancang ken kokat oMiccie. ⁵ Anaruk Kapik kakkarrnopira noka nakin thoppot, anakka okin thillet, ka ken kokwentakathe ika kothampang appik.

⁶ Lon elli lokkattathe appik aron oneko lon nan alangwot ton, aron okorronno onekket mikit monnon na'rupu iokithak ammakka thiki thonnon thokkothe. ⁷ Nokorronno a'rane 'ran worinikkillan nga'rama ammakka thiki thonnon th'rek thokat akka "lokurrakot itti ul appik wikkot a'rkoik ana ikko ngapak aurokat aukkw." ⁸ Oron thouu itti oron thakorronno omakot lon lotha'raro ngngin ammakka opilingon thokat akin okkot ana ul willekathe ca'ri culukku athar arrial we'ra ana ikken k'rapuruk (23,000). ⁹ Oron thouu itti oron thakorronno ennekke ili, ammakka opilingon thokkettethe ana inyil wongwathekin. ¹⁰ Ana onon thouu itti nthakorronno a'rettakot ammakka opilingon thokkothe ana u'rupa wothothilettat woKapik iangwaro wongwathekin.

¹¹ Lon elli lokkattanthe kin othakka itti akin oneko lon nan ana lokat lokurrakot iatham woKapik aloken-eron cakuruk itti ma'ri maik macothakot noluput lonnon. ¹² Ittina amma onon thakatha manna itti onon

theet tacok ncik papenang, anno'rumoik akka anna-pukko. ¹³ Thennekketta thella ithaik prek thainet non anaruk thennekketta ithaine ul appik ithen akkaine non. Ana Kapik koporot kakorrno okorronno itti onon thennekketta llon ilalkot non. Anaruk amma onon thennekkettat, kethet non pu'ran annocokot cikit ilon len ana anyinenon kathar ikappiet non thapat ntit othakka itti annothipoik tit.

¹⁴ Ittina pangkingon nopa'rine tha'rane 'ran worinikkillang nga'rama cik. ¹⁵ Mpaik perenenon ammakka ul inaik annina lon ila mpongothe itti mpi're amma laik icat alla karra. ¹⁶ Keththe'ret ikokat cik nothu'rit thocipin tholli ana ikaron thopiranet Kapik noka ntit amma oron ikkoik ntit, oron thulukku iuccük ngoMiccie. Ana arrakith iaron thomithot tit amma oron o'rko, ittina oron thulukku ika koMiccie, ¹⁷ anakka arrakith wulukku, oron ithoppot thothakka ka kulukku akka oron thaik tha'rko arrakith wulukku.

¹⁸ Nantokwarttikot lon loul woIccereil, okin ithaik tha'rko a'rupu wothokinthe Kapik ngüccük cik noru'rot ta'rama, okin thakorrnoka thulukku ire ngoKapiki? ¹⁹ Nthakatha itti mpongothe itti mpi'ret non itti a'rupu iokecanthet 'ran worinikkillan cik wonu lon ciki alla 'ran akkonu lon cik? ²⁰ Lakorronno oka menik, anaruk a'rupu wothokiot ngüccük cik woul iakorronno oka wouth waine u'rupa iokithak ana wakorronno oine Kapik. Ana mpakarrnngankot itti onon thaka thulukku nu'rupa iokithak. ²¹ Onon thakinnikko ng'ri nti ikeththe'ret koili ana kou'rupa iokithak, nthakorrno'rko thu'rit annoMiccie nokuppu'rung kulukku ana appo'rko nokuppu'rung kulukku nou'rupa iokithak. ²² Oron thongothe itti oron thuet ili kaiki? Oron thonthomat naaki?

Nokkot appik annopirie Kapik noka

²³ Opilingon nti ianon thi're itti “Oron thakkot lon appik ilaron thongothe itti oron thakkot” anaruk mpi'ret non itti lon ncik appik lakorronno oka loporot ana lakir-rnittararot. ²⁴ Nokorronno okwariccanthet ka kon thoporot anaruk nokwarccanthe ul w'rek thoporot cakuruk. ²⁵ No'rko kapa appik ikaik keccuk nokorronno ipitto lon ila nthonu ima. ²⁶ Akka “capu ncik appik colli ana a'rupu iaik tit appik.”

²⁷ Amma opilingon ithakannocokot lon loleccuo thakkarothenon thu'rit, anno'rko okorronno ipitto lon ilanon thonu ima. ²⁸ Anaruk amma opilin akki'rethung itti “papu empi pokiakinthet 'ran cik ikkillan,” nokorronno o'rko nti ilon lopul ipi'rethenon ana nti ilon ila pul pen ponu ica ²⁹ lon ila pul p'rek ponu ica okorronno oka ilanon thonu ima. Ngintha akka pul p'rek akkmane lon ila mpongothe llon lung? ³⁰ Amma mpaik pa'rko thu'rit thothopirane Kapik noka ngintha akka aul orukenthin itti mpaik pakkot lon lokithak?

³¹ Ittina thu'rit itha'rko ana a'rupu ia ikko ana manna lon ilakkot appik, okkinthet thr'ik thoKapik. ³² Nokorronno onane ul woIouth ana iannoka woIouth ana manna ul iocokothe lon loleccuo lon moloko ³³ oun cakuruk pakwncot kathar ika anopiriekin noka appik kurekkurek. Akka mpaik pakorronno okwancot thoporot thoka kin anaruk thoporot thoul woppot, othakka itti akin o'rettat.

11

¹ Nommakot lon lin ammakka mpaik pammakot loMic-cie.

Kathar kotha'ra nga'rama

² Mpopirat noka nanon akka nthaik thakwarttikothin llon appik ana onon tho'rumot nolon ila mponkenet

non, ammakka mpongkenet non. ³ Ana mpongthe itti onon nthina nan itti oMiccie paca coul iomura appik ana ul iomura wama moul iari ana Kapik kaca coMiccie. ⁴ Amma pul ipocura ere lon loKapik ana manna a'ra nga'rama akwo'rumot ca ngkret, kwaik pathie ca cung cik. ⁵ Ana amma pul ipopari ere lon loKapik ana manna a'ra nga'rama appakorronno o'rumot ca ngkret, paik pathie ca cung, pikkoik ere pokekot ca. ⁶ Ana amma pul ipopari pakarrnangkot itti paku'rupakot kret noca, ponu itti pakeko ana amma lothiettot cik itti pul pakorronno okeko ponu itti paku'rupot kret noca. ⁷ Pul ipocura ponu itti pakorronno ok'rupot kret noca akka ook purrut ana thrik thoKapik. Anaruk pul ipopari pathrik thopul ipocura. ⁸ Akka pul ipocura pakorronno ao nti ipul ipopari anaruk pul ipopari akkaat nti ipul ipocura. ⁹ Pul ipocura pakannokkattanthet pul ipopari anaruk pul ipopari akkokkattanthet pul ipocura. ¹⁰ Ana nti ilon len ana nti ilon lou'rupa wothothilettat woKapik, pul ipopari ponu itti paku'rupot kre noca, ittina alon len okene itti paccikot lon olle.

¹¹ Anaruk iul ioccoke the lon oleccuo, pul ipopari pakannoka prek nopul ipocura ana pul ipocura pakorronno oka prek nopul ipopari. ¹² Ana ammakka pul ipopari paat nti ipul ipocura ana cakuruk pul ipocura pokwontat nti ipul ipopari ana lon appik lao noKapik. ¹³ Nipittot ka kon itti, loporot itti pul ipopari pa'rane Kapik nga'rama apokorronno oku'rupot kret nocai? ¹⁴ Akka lon ncima'rot lakeneron itti amma pul ipocura ponu wan wukwirukwit wokithak tokit koul ¹⁵ anaruk amma pul ipopari ponu wan wukwirukwit ien thrik thung akka wan iukwirukwit weettathok akwo'rumakot nngin. ¹⁶ Amma opilin paik pongothe itti kwa'retto nolon elli, onin ana ul ioccoke the lon loleccuo woKapik thella

thathuma th'rek nenthi.

Thu'rit tholli thocipin

¹⁷ Anaruk nothocimitto itha mpaik patheret, mpakorranno opirananon noka akka tha'ra nga'rama thon thonu thietto ka kongo thoppot nothikkoik thoporot.

¹⁸ Ila mpaik paccikot itti, amma onon thaath tothun ammakka ul iocckothe lon loleccuo, onon thillillakorit, ana mpakathe itti laik icat. ¹⁹ Laik icat itti onon thillillakorit othakka itti akkwion ithoporot tokit koKapik inako.

²⁰ Amma onon thaath tothun, onon thaik thakorranno'rko thu'rit tholli thocipin, ²¹ akka amma onon o'rkoik onon thakorranno o'rikarot. Ittina opilingon thapakkot tit thiamat apilingon aapak ngongwot. ²² Onon thella kaman na onon o'rkoiki? Onon thaik tharakke ul iocckothe lon loleccuoi ana okkot ngure noul iella a'rupu w'rek ciki? Ngintha akka ani'ret non? Mpapira noka nanon nolon elli? Lakorranno oka menik.

²³ Akka elli akka mpoccot nolli ana mpaik perenenon ammakka mpocckothe itti, Ili oleccuo noca'ri icakwoket-tathe nili nan, kummot arrakith ²⁴ ana akka kwopiranet Kapik noka kwomithatherit akwi'rekat itti, "ka kin engki ikettathenon. Nokkot elli annokwarttikothin ngngin."

²⁵ Ana menik cakuruk kwappronekat keththe'ret, akwi'rekat itti, "keththe'ret engki kothonekket lon cik ilie ngüccük ngin, amma nikko ntit, annikko ntit annokwarttikothin ngngin." ²⁶ Akka amma onon o'rko thu'rit ana ikkoik nti ikeththe'ret engki, onon thaik thangkene lon lothio tholli puccuk akwokkaprttakat ntan attang.

²⁷ Ittina okkwi ipa'rko arrakith enni ana ikkoik nti ikeththe'ret kolli ngkathar karrnnoka koporot, kwaik pakkot lon lokithak noka ana noüccük ngolli oleccuo.

²⁸ Ittina onon thonu itti nthina ka kon antharthuk o'rko thu'rit ana ikkoik nti ikeththe'ret. ²⁹ Akka okkwi ipa'rkoik

ana ikkoik akkwomma ka kolli, kwaik pa'rkoik ana ikko thakkma thoka kung. ³⁰ Ilen akka opilingon thoppot nti ianon thommangka ana thongo, ana okin thoppot thillet. ³¹ Anaruk amma oron thakkmakot ka konnon, oron thakorrno akkmako. ³² Amma oron thakkmakot nli, laka itti akwocimitoron okorrno akkmako ncapu ncik appik.

³³ Ittina pangkingon, amma onon thaat tothun itti onon tha'rkoik no'rikot opilingon ithella akin anthan. ³⁴ Amma opilin piamat, akwo'rkoik tuan othakka itti amma onon thaat tothun, akwokorrno akkmako. Ana amma mpokkprttakot mpappethet non lon loppot ilanoreko ngngin.

12

Thethet noKanang ikupupure

¹ Pangkingon, nolon loKanang ikupupure mpakanangkot itti nthamma lon l'rek. ² Onon thina akka onon thokat thommat Kapik, nthokat annommakot lon lo'ran. ³ Ittina pangkingon, mpi'ret non itti pul pella ipaik pere ngKanang ikupupure pi're itti "Aleccuo attattako," ana pul pella pi're itti, "Oieccuo palli" amma Kanang ikupupure kella naak.

⁴ Thethet noKanang ikupupure thaik kurekkurek anaruk Kanang ikupupure kulukku ikana thethet enthi appik. ⁵ Ana ngre ngaik kurekkurek iarekagine ul ioccoke lon loKapik anaruk Ili wulukku iaron thaik tharekine. ⁶ Athar waik woppot iakkattat ngngre, anaruk Kapik iken kulukku akkaik karekie athar wen iul appik.

⁷ Thethet nokanang ikupupure thettatheron kurekkurek aron ittararot kurekkurek. ⁸ Kanang ikupupure kikketheron lon kurekkurek, opilin paKanang kethet kathar kotherene ul lon loporot ilakene thina cik

ntica ana opilin pakkethet kathar kothina lon ngngin pellek ⁹ ana opilin pakkethet thoccokot lon nocikit ngKanang ken ikulukku ana opilin pakkethet thittiet ul, ¹⁰ opilin pakkethet pu'ran pothokkot lon ilommaththik ana opilin pakkethet pu'ran pothernte lon loKapik ana opilin pakkethet pu'ran pothopetto iKanang kurekkurek ana ina ikoporot ana ikokithak ana opilin pakkethet pu'ran pothina ere karru koul w'rek ana opilin pakkethet pu'ran pothopakkukkwet ikarru ken ngkarru k'rek. ¹¹ Ngre engi appik ngoKanang ken ikulukku ana Kapik kikket ton lon len kurekkurek ammakka kongothe.

Ka kulukku mpangken poppot

¹² Ka kopul kulukku antoka manna itti konu pangken tit koppot anaruk icci kulukku Ana ittina naMiccie cakuruk.

¹³ Akka oron appik thoccot mamuthie ngKanang kulukku ika kulukku ana antoka manna ul woIouth ana manna ul iannoka woIouth ana manna ul iaiak ana manna ul iakanoka iaiak. Ana oron thikkot nti ikeththe'ret ngKanang kulukku.

¹⁴ Ka kakonnokkattat nopangken kulukku anaruk nopangken poppot. ¹⁵ Ana amma wek wi'ret itti,

“Mpakannoka ukun, ana ittina mpakannoka inoka” menik lakannoka itti wek waik prek ella ka. ¹⁶ Ana amma kunu ki'ret itti,

“Mpakannoka cit, ana ittina mpakorronno oka inoka” menik lakannoka itti kunu kaka prek ella ka.

¹⁷ Ana amma ka appik ncik kacit, ana pul paccikot ngkren? Ana amma ka appik ncik kakunu, ana pul pakkunakot cik ngkren?

¹⁸ Anaruk Kapik kothettothe ka cik mpangken ammakka kongothe itti kaka. ¹⁹ Amma okin appik thokat ka kulukku, ka kaka kartha?

²⁰ Ittina ka konu pangken poppot anaruk kulukku.

²¹ Kit kakarrni'ret nyaun itti, “Mpella kit kang” Ana ca cakanni'ret tacok itti, “Mpella kit kang” ²² Annoka menik,

ana ka ikaron okatha itti kella ngre cik iken akkonu ngre cik iaccakot kit nan,²³ ana ka ikaron okatha itti kakorrno othiakine cik kannan iken akka oron othiane cik ngkathar pellek. Ittina oron tha'rumo noka ken papenang ikira kellako kit ken,²⁴ ana ka ikaron okatha itti koporot konu itti kellako kit ken. Anaruk Kapik kokottothe ka tothun appik ana kothikkiet ka ikellakot lon len kothiakiniet cik,²⁵ ittina ka konu itti kakinnillillakorit anaruk konu itti kakathako itti kulukku mpangken p'rek.²⁶ Amma pangken p'rek pongo ka kaka kongo ncik appik ana amma pangken p'rek pothiakiniet cik ana pangken p'rek ncik appik papira noka.

²⁷ Ittina onon thaka koMiccie ana onon appik thapangken poka koMiccie.

²⁸ Ana iul iocckothe lon loIeccuo, Kapik konekkethe ul wothothilettat woIeccuo cik cittokit ana ul wothernte lon loKapik ana ul iangkene ana ul iakkot lon ilomaththik ana okkwion ithonu pu'ran pothittiet ul nomio ana okkwion ithonu pu'ran pothittarot ana okkwion ithonu pu'ran pothokathacce lon lore ana okkwion ithere ngkarru koul w'rek.²⁹ Okin appik thaul wothothilettat woIeccuo appiki? Okin thaul wothernte lon loKapik appiki? Okin thaul iangkene appiki? Okin thaul iakkot lon ilomaththik appiki?³⁰ Okin appik thonu pu'ran pothittiet uli? Okin appik there ngkarru koul w'reki? Okin appik thapakkukkwet ilon ngkarru koul w'reki?

³¹ Anaruk nthongothe itti nthina iloporot kannan.

Ana inenni mpakenenon kathar ikoporot.

13

Thongarot

¹ Amma manna mpantere karru koppot koul w'rek ionyi ana karru kou'rupa wothothilettat woKapik anaruk

Kurunthuc 1 13:229Kurunthuc 1 13:13

mpella thongarot, lon lin laka ere po're pocurntuk. ² Ana amma mponu pu'ran pothernte lon loKapik ana pu'ran pothina lon ilamu'ruttakot ncik ilanthen ana pothina lon ncik appik, ana mpocokotho lon nocikiti itti mpamukkie mo'rong ncik noka'ran ken anaruk mpella thongarot, mpakonnoka poporot. ³ Ana amma mpethet ul tha'rthan thin appik iaiak ana manna ok're ka kin nthik anaruk mpella thongarot mpakirnniot lon l'rek ntit.

⁴ Thongarot thaik itti thocokot cikiti ilon ana thoporot lon ana thakoronnoka thonyira ana thakorrunno ipot ka thoura. ⁵ Thongarot thakorronnoka thonthoma ca ana thakorrunnoka thrik nan ana thakorrunno ua ka accokkot ana thakorrunno a'rntot lon ilokithak cik. ⁶ Thongarot thakorrunno opirane lon ilokithak noka anaruk thapirane lon noka ilaik icat. ⁷ Thongarot thangwarot ana thonekket cikiti nolon ana thonu tho'rikot cik ana thacokot cikiti ilon.

⁸ Thongarot thakorrunno omattat. Anaruk nalon lotherente lon ana there ngkarru koul, koul w'rek thaco'ro ana thinaik nti ica thaco'ro. ⁹ Akka oron thina lon lotte ana oron there ilaKapik kethet ton ammakka ul wothernte lon loKapik itti oron there lotte, ¹⁰ anaruk amma oMiccie pokkaprttakot mono alon ocothakot, lon ilokat lakorrunno ocothakot lintat cik. ¹¹ Akka mpokat parthuk potteik, mpokat anere ere ukul iotteik ana mpokat anokwarttikot cik ere ukul iotteik ana mpokat anothettot lon cik ere ukul iotteik. Manakka mpocokkat, mpopa'ranthet lon lothathukur cik. ¹² Papu iparon thaik thakathacce inenni pikkoik ere papu ipaik imanthena, anaruk oron thimma ncik appik ana kicce amma oron thincettothe ncinokkit. Inenni mpina lon lotte anaruk mpina lon ncik appik ammakka mpinakot ncik appik.

¹³ Ana inenni elli il'rapuruk la'rungkwot cik, thocokot

lon nomik̄it ana tho'rikot cik ana thongarot anaruk thongarot akkr̄ik nti iakin appik.

14

There lon loKapik ana Karru k'rek ikommako

¹ Nommakot kathar kothongarot ana kannan nongat lon ila Kanang ikupupure ethet non ana anganna lon lothernte lon loKapik. ² Akka okkwi ipere ngkarru ikommakot kwaik pakarrnnerene ul anaruk kwaik perene Kapik. Ana ĩcarĩcat pul pella pina lon lung, akka kwere lon ilommakot nan ngKanang kung ikupupure. ³ Anaruk okkwi iperene ul lon loKapik, perene ul akwopo'riekin than ana omereket kin llon loKapik ana apiet kin cik. ⁴ Okkwi ipere lon ngkarru ikommako pittarot ka kung tulluk ana okkwi ipere lon loKapik pittarot ul iocokothe lon oIeccuo. ⁵ Mpongothe itti onon appik there ngkarru ikommako anaruk mpongothe cittok̄it itti onon therene ul lon loKapik. Okkwi iperene ul lon loKapik ook akkoprot kannan nakkwi ipere ngkarru ikommakot anaruk amma kwaik papakkukk̄wet lon tit othakka itti aul iocokothe lon oIeccuo opo'rathan, laka loprot.

⁶ Pangkingon, amma mpainet non mono anerenenon ngkarru ikanon thomma ngintha akkathikkien poporot nanon? Anaruk amma mponanet non thitto lon ncik th'rek ana manna thina lon ana manna there lon loKapik ana manna thocimittaro anokakat poporot. ⁷ Ana amma a'rupu ieettat nokamuthe wonu ngeme ngulukku oron thina ngeme ngothungkurung ana ngoperenmperen amma po're pakorronno oka kurekkurek taththa? ⁸ Ana cakuruk amma thĩpĩl thakarrnnetta papenang tho'ho'rak, oththa akkacucekinthet tho'rak cik? ⁹ Ittina laka menik cakuruk nnanon. Amma ngkwakerrnere lon ngkarru ikaul wina, ul wina lon ila ngkwaik pere taththa?

ngkwere lon ngkanang nuthuk. ¹⁰ Karru koppot nocapu ncik appik ikeretta kurekkurek anaruk kella ikella lon cik. ¹¹ Ana amma mpakorronno occikot lon ila pul p'rek paik pere, mpaka ere pul pokwat nopul ipaik pere ana kwakanin ere pul pokwat cakuruk. ¹² Ittina lapakkinthet non. Ana inakka ngkwongothe itti ngkwina lon loKanang ikupupre, ummi lon ilapo'rie ul ioccoothe lon loIeccuo than.

¹³ Nti ilon elli, okkwi ipere ngkarru ikommakot ponu itti kwa'ra ng'rama itti kwapakket lon tit ila kweret. ¹⁴ Akka amma ana'ra nga'rama ngkarru ikommakot kanang kin kaik ka'ra nga'rama anaruk mpakirnnina lon ilampaik peret. ¹⁵ Ittina ngintha akka anokkot? mpa'ra nga'rama ngkanang kin anaruk mpa'ra nga'rama cakuruk ngngath're ngin, ana mpangwo ngkanang kin anaruk cakuruk mpangwo ngngath're ngin. ¹⁶ Amma ngkwaik papirane Kapik noka ngKanang ikupupure, okkwion ithakorrno occikot lon ila ngkwaik papirane Kapik noka thathiot tit taththa akka okin thomma lon ila ngkwaik peret? ¹⁷ Ngkwikko paik papirane Kapik noka kicce anaruk pul pella ipopo'riettat than llon ila ngkwaik pere.

¹⁸ Mpapirane Kapik noka akka mpere lon ilommakot kannan nanon appik. ¹⁹ Anaruk iul ioccoothe lon loIeccuo mpi're lon ukuluk ngkathar ikaul ina thocimitto pangken ngngin nothere lon athar attul ilommakot. ²⁰ Pangkingon, noce're thokwarttikot cik thothathukur. Anaruk nella lon cik ilokithak ere nyukul inyarran, anaruk nokwarttikot cik ere ul iocokkat. ²¹ Lokurrakot ilon lothonce'ret lon cik itti,

“llu're loul iere ngkarru ikommakot
 ana nnuthut woul iakwat
 Ili wi're itti, mperene ul enni,

anaruk antoka manna itti okin thakorrnno occikot lon lin.”

²² Karru ikerettanet ul ikommakot konu lon prek noul iakorrnno occokot lon loIeccuo ana there lon loKapik thaine ul iocckothe lon loIeccuo ana thakorrnno oine ul iakorrnno occokot loIeccuo. ²³ Ittina amma ul iocckothe lon loIeccuo waat appik tothun ana ul appik ere ngkarru ikommakot ana opilingon thomma karru ken ana manna ul w'rek iakorrnno occokot lon loKapik, okin thakarrni're itti onon thonu ururi? ²⁴ Anaruk amma pul ipakorrnno occokot lon loIeccuo ana manna pul p'rek ipomma karru ikaik keretta pi'rikot ntan akka anon ere lon loKapik, kwaccikot lon loul appik ana kwina itti kwonu lon ilokithak ana kwakkmako llon ilerettat appik, ²⁵ ana lon lung ilamu'ruttakot ncik lonocikit cung linako nan attattar. Ittina kwapot nocapu akwa'rane Kapik nga'rama akwi're itti, “Kapik kaik nanon icaricat.”

Thothettot nga'rama cik

²⁶ Pangkingon, oron thi're taththa? Amma onon thaat tothun oron thonu unye kurekkurek ana manna lon lothocimitto ana manna lon thitto lon ncik ana manna karru ikommakot ana manna thopakkukkwet lon tit. Elli appik lakkattanthet thopo'ra than thoul iammakot oIeccuo oMiccie. ²⁷ Amma opilin pere ngkarru ikommako, akin ere the'ra ana th'rapuruk kurekkurek apilin opakukkwet lon len tit. ²⁸ Anaruk amma pul pella ipapakkukkwet lon tit, okkwi ipaik pere ngkarru ikommakot, ponu itti kwangkoik tokit koul iocckothe lon loIeccuo akwerene Kapik ana ka kung.

²⁹ Ul wothernte lon loKapik we'ra ana manna w'rapuruk wira were lon loKapik ana apilingon occikot kicce itti ngimpen akka okin thaik theret. ³⁰ Ana amma lon lothitto

lon ncik lainet pul p'rek ipaik pikkoik nothorrok, okkwi ipaik pere cittokit ponu itti kwaco'ro. ³¹ Akka onon appik there lon loKapik othakka itti aul appik ocimittako ana opo'rietta than. ³² Kanang koul wothernte lon loKapik kaccikot lon lon nokanang koul wothernte lon loKapik. ³³ Akka Kapik kakorronno oka kothokitto lon anaruk kolon iloporot.

Ammakka nocungkut coul appik woKapik iupupure, ³⁴ lakorrnnoka loporot itti pul ipopari pere amma ul iocokothe lon loIeccuo waik tothun. Okin thakorrrno ere anaruk okin thangoik icci akin occikot lon ammakka lon lothonce'ret lon cik li'ret. ³⁵ Amma okin thongothe itti okin thipitto lon l'rek, okin thonu itti okin thipittot ollen tuan akka lokithak itti pul ipopari peret tokit koul iocokothe lon loIeccuo.

³⁶ Lon loKapik loku'rettat nanoni? Onon akka lainet thereki? ³⁷ Amma opilin pi're itti kwettathe lon loKanang lothernte lon loKapik, akwina nan itti mpaik pakurri-nenon lon ilonthomat lolli. ³⁸ Ana amma kworakket lon len ana kwarakketta.

³⁹ Ittina pangkingon nongat itti nthere lon loKapik, ana nokorronno oce're there lon ngkarru ikommakat. ⁴⁰ Anaruk lon appik lonu itti lakkattat lekkot nan ana ngkathar ikoporot.

15

OMiccie purokiettat nti ithio

¹ Pangkingon, inenni mpongothe itti mpakwarikiet non lon iloporot loIeccuo ila mpongkenet non ana ila nthoccot ana ilanon tho'rumot nan. ² Onon tha'rettat llon iloporot loIeccuo elli amma onon tha'rungskwotherit ana o'rumo nan papenang ammakka mpongkenet non. Anaruk amma onon akka akorronno occokot lon len

nomikït, thocokot tholon loKapik nomikït thon thaka nuthuk.

³ Akka ila mpoccot mpethet non ila mpoccot akka loporot ana ilen itti oMiccie piot nti ilon lonnon ilokithak ammakka nAtham noKapik neret, ⁴ ana itti kwocikkakot ana kurokot noma'ri im'rapuruk ammakka nAtham noKapik neret, ⁵ ana itti kumminthet oPoththuruc ncik ana ul wothothilettat wung iattul ana ikken ke'ra. ⁶ Ittina kwappurumant het ul iammakothok ncik iokat maun arrial ukuluk ma'ri ukuluk (500) iokat ul iammakothok ana opilingon manna thaik ngkït thapat inenni ana opilingon th'rek thillet. ⁷ Ittina akumanthet oIakup ncik ana ul wothothilettat woIeccuo appik. ⁸ Ana ocothot p'rin, kumanthin ncik cakuruk ammakka pul ipokorronno okwonta poporot.

⁹ Akka oun akkotteik noul wothothilettat woIeccuo appik ana manna mpakorronno oka pekkot nan itti mpakkarako itti pul pothothilettat poIeccuo akka mpokkikkiethe ul iocokothel lon loIeccuo thiak kannan. ¹⁰ Anaruk nthoporot thoKapik, mpothakkat ammakka mpaik ina ana thoporot thung naun thokat thakorrrnoka nuthuk. Aa, mporekot ngre ngung kannan nakin appik anaruk mpakannoreko mpu'ran pin anaruk thoporot thoKapik ithokat naun. ¹¹ Ana antoka manna oun ana manna okin, ilen elli akka onïn thaik thangkene ana ilen akka onon thocokothel nomikït mon.

Thuroko thoul iillet

¹² Anaruk amma longkenettat itti oMiccie purokot nti ithio, ngintha akka opilingon nti ianon i'rene itti thuroko thoul iillet nti ithio thellaik? ¹³ Amma thuroko nti ithio thellaik, oMiccie manna pakannaurokot nti ithio. ¹⁴ Ana amma oMiccie pappakarrnnauroko nti ithio, thongkene thïn thella lon cik ana thocokot lon loKapik nomikït

thon thellat lon cik cakuruk. ¹⁵ Ana oron thonat karra llon ilaron thi'ret itti oron thimmat ngkit lon loKapik akka oron therethe Kapik itti kurokiet oMiccie nti ithio. Anaruk kwakarrnnurokiek amma icat ul illet wakorrnno urokietta. ¹⁶ Akka amma ul illet wakannurokietta nti ithio, ana oMiccie pakannaurokietta nti ithio cakuruk. ¹⁷ Ana amma oMiccie pappakarrnnurokietta, thocokot lon nomikit thon thellat lon cik ana onon tharthuk thaik ilon ilokithak. ¹⁸ Ana cakuruk okkwion ithillethe iaMiccie thuratheik nuthuk. ¹⁹ Ana amma nothikkoik enthi oron thonu tho'rikot cik thonnon iaMiccie tulluk, oron thipako thiak then noul appik.

²⁰ Anaruk ilaik icat itti oMiccie purokiettat nti ithio ana ook akkurokot cittokit noul iokat willet. ²¹ Akka inakka thio thaat nopul iponyi ana cakuruk thuroko thao nopul iponyi. ²² Atham ponanet ton thio appik anaruk oMiccie ponanet ton thuroko nti ithio appik cakuruk. ²³ Anaruk ul wuroko kurekkurek ammakka okin thothet-takotheik, oMiccie akkuroko cittokit akka ook porokit aul antomakot ioccoothe lon lung amma akwao. ²⁴ Ana thocothakot thocapu thao, amma oMiccie pethet othan ngili ikkun amma kwokittot ngili ana pu'ran popul pothopulut ipaik nocapu appik. ²⁵ Akka kwonu itti, kwakkma puccuk aKapik onekkekat tho'rak thung iracok tung. ²⁶ Ana tho'rak ithakittako alon ocothakat ncik p'rin, ithen thathio. ²⁷ Akka lokurrakot iatham itti, “Kapik konekkethe a'rupu appik iracok toMiccie.” Lon ili're itti “a'rupu appik.” wonekkettathe iracok toMiccie laik itti Kapik kella ilon len akka ook iponekkethe lon appik iracok toMiccie. ²⁸ Ana amma a'rupu appik waik ikkun woMiccie, ittina ook ngka kung ukul wung, wanekket kakung ikkun woKapik ikokat konekkethe a'rupu appik ikkun wung ana Kapik kakkma lon ncik appik kirrkir.

²⁹ Inenni amma thuroko nti ithio thella, ul wakkot taththa ioccot mamuthie? Amma ul illet wakorrno urokietta kirrkkir, ngintha akka ul occerne mamuthie?

³⁰ Ana naron, ngintha akka aron orekine thiak appinappin? ³¹ Pangkingon, mpennekketta nthio appinappin akka mpipot non ka thoura ngngin ithikkoik thon ithaik

iaMiccie Ili wonnon ook ipokarnnorin anere lon len.

³² Ittina amma mpothattot ia'rupu iommaththik ere ia'rupu woripira noka'ran kaPuccuc nti ilon lopul iponyi, ngintha akka aniot nti ilon len? Ana amma ul iillet wakarrnnurokietta nti ithio,

“Ton o'rkoik ana ikko a'rupu iaik,
akka gorrot oron thille.”

³³ Nokorronno ammikkakot, “thommakot lon ilokithak thathikkie ul ioporot wokithak.” ³⁴ Nokkapttako ntan ikathar ikoporot ana oco'ro nti ilon ilokithak. Akka mpi'ret non itti opilingon nti ianon thomma Kapik, mpi're elli alothienon cik.

Thuroko thoul illet

³⁵ Anaruk opilin manna pakaik pipitto itti, “Ul wurokietta nti ithio taththa? Ana okin thuroko ngka karaththa?”

³⁶ Onon thommaik, amma onon theet more ma'rupu w'rek makorronno ummot amma mannille kappak. ³⁷ Amma aee core, ngkwakorronno ocikkaro ka ikathoka, anaruk ngkwee core culluk antoka manna coc'il ana manna copap'rek.

³⁸ Anaruk Kapik kethet more men ka kurekkurek ammakka kongothe itti maka ngka ken. ³⁹ Ka kakannoka kulukku. Ul ionyi wonu aken threk ana a'rupu worua

wonu aken threk ana u'rupe wonu aken threk ana ape wonu aken threk. ⁴⁰ Ka kaik korothi'rot cakuruk ana kaik konocapu anaruk thire thoka thorothe'rot thaik prek ana thire thoka konocapu thaik prek. ⁴¹ Cingki conu thire

thung prek ana kwanok konu thire thung cakuruk prek ana mothot monu thire then kurekkurek nam'rek.

⁴² Ittina laka menik amma ka kurokot nti ithio. Ka ikocikkakot kakittako ana amma kurokot ana kakorronno okittako. ⁴³ Kacikkakot ella thothiakine cik ana kurokot nti ithio nthrik, kacikkakot ella pu'ran cik ana kurokot mpu'ran ⁴⁴ kacikkako akkaka kopul iponyi nuthuk ana kuroko ngka koKanang ikupupure.

Amma ka kaik kopul iponyi nuthuk ana kaik koKanang ikupupure. ⁴⁵ Ittina lokurrakot itti, "Pul iponyi pocittokit Atham pokat pul nuthuk." ana Atham ipocothothe pokat okkwi ipethet Kanang kothikkoik. ⁴⁶ Ka ika Kanang ikupupure kakannao tokit, anaruk ka nuthuk akkaat tokit akoKanang antomakot. ⁴⁷ Pul iponyi pocittokit pokat pokkattathe naacok ngonocapu anaruk pul iponyi ipomakothe pokat porothi'rot. ⁴⁸ Ana ittina okkwion thonocapu thungkwot okkwi ipokkattathe nocapu ana okkwion thorothe'rot thungkwot okkwi ipaat ntothe'rot ⁴⁹ Ana inakka oron thammakka ul ionyi wonocapu, oron thaka ca'ri c'rek ammakka ul worothi'rot cakuruk.

⁵⁰ Pangkingon, mpongothe itti mpi'ret non itti ka ana ngüccük kakorronno opakot nongili ngoKapik ana manna ka ikakittako kakorronno opakot noka ikakorronno okittako. ⁵¹ Noccikot ani'ret non ilamu'ruttakot ncik. Oron thakorronno ille appik anaruk oron appik thaprttakoik akkaik ⁵² ana accokkot ana nothipil itha-cothot amma theettat, ul illet wurokietta ana wakorronno appille ana oron thaprttakoik. ⁵³ Akka ka ikakittako konu itti ka'rumakot ngka ikakorronno okittako ana ikokithak konu itti kaprttakoik akothakka ka ikakkoik thupuththuput. ⁵⁴ Ana amma ka ikakittako ko'rumakothe ngka ikakorronno okittako ana ikokithak ko'rumakothe

ngka ikakkoik thupuththuput, ittina lon elli ilokurrakot laka icat ili'ret itti “thio thellaik p'rin.”

⁵⁵ “Thio, thalkot cik thang thaik kartha?

Thio, pu'ran pang paik kartha pothie ul ka kongo?”

⁵⁶ Thio ka kongo kothio thalon ilokithak ana pu'ran polon ilokithak palon lothonce'ret lon cik. ⁵⁷ Anaruk thopira noka thaine Kapik, kwethet ton thalkot cik nli oIeccuo oMiccie.

⁵⁸ Ittina Pangkingon no'rumoik. Nokorronno okorronno pap'rek itti papa'renon cik. Norekine Ili mmikit appik akka onon thina itti ngre ngon ngolli ngakorrno urat cik nuthuk.

16

Tha'rntinthe ul ioccoke lon loeccuo a'rupu

¹ Ana nolon lotha'rntinthe ul ioccoke lon loeccuo a'rupu, mpi'ret non itti nthakkot ila mpi'rethe ul ioccoke lon loeccuo noththok poKalaththia itti wakkot. ² Noca'ri ca'rama onon kurekkurek thonu itti nthanekket akucci w'rek cik prek naang iangkwaik pareko ngngin, othakka itti amma mpaat anatheot akucci anon tha'rntotheik. ³ Ana amma mpaat, mpethet ul ianon thipotheik ngka'ramacak ikakene itti okin okkwengon anothi'at kin noka'ran koUruccelim nakucci. ⁴ Ana amma loporot itti mpaeo noka'ran koUruccelim cakuruk ana okin thamakothin.

Lon ila pul ipitto loka kung

⁵ Amma mpeot noththok poMakthonia mpainenon akka mponu itti mpakko than cakuruk. ⁶ Ikkre oron thathikkoik papotte ana nothuput thoricpo appik, othakka itti annittarothin nokurtti kin na aneo. ⁷ Mpakarrnngakot itti mpathokathanon ngkathar,

mpongothe itti mpathikkoik uraththungon papotte amma Ili akkongothe itti laka. ⁸ Anaruk mpaik pikkoik noka'ran kApuccuc puccuk aca'ri akkakat cokamuthe kothokio mīl. ⁹ Akka Kapik kanyinthin kathar cik cene anokkot ngre ana opilingon thaik thoppot thalikinin cik.

¹⁰ Amma oThimiththaoc paat annikkiek cik papenang noma'ri ima kwaik cīnang, akka kwaik pakkot ngre ngolli ammakka mpaik pareko. ¹¹ Pul pella parakke lon lung, Nothiōthok ikathar llon loporot othakka itti akwokkaprt-takinin. Mpaik pa'rikothok īnopangkingon th'rek.

¹² Ana nolon lopang ponnon Apolloc mpokat cik anat-takiet cik itti kwayne non okin opang ponnongon th'rek. Kwokat p'rat anthan noma'ri emmi anaruk amma kwio-the ca'ri ana kwathokatha non.

¹³ Nangwot ka ana o'rumoik ithocokot lon nomikīt ana okorronno apo ka ntit ana opo'rathan. ¹⁴ Nokkot lon appik nthongarot.

¹⁵ Onon thina itti ul woruan toCiththippanac wokat ul wocittokīt ioccoke the lon loIeccuo noththok poKrik ana okin thangkathe itti okin tharekine ul iupupure woKapik. ¹⁶ Mpi'ret non itti nthaccikot ul iammakka enni ana opilingon ithokattakothe ire akin oreko. ¹⁷ Mpopirat noka kannan nothao thoCiththippanac ana oProththonaththoc ana Akkaikkoc akka okin thokkothe lon ilanon thokat thakoronnokkot. ¹⁸ Okin thopo'riet kanang kin than ammakka okin thopo'riet kanang kon than cakuruk. Ul iammakka enni wonu itti wapirietta noka.

Thomicco ithacothot

¹⁹ Ul ioccoke the lon loIeccuo noththok pAccia waik wamicco non, Akkila ana oPricikkila thotheinthet non thomicco ngk'ran kolli ana ul ioccoke the lon loIeccuo

ia'rintattakot tuan thanen. ²⁰ Opang ponngon cene appik thaik thamicconon. Nomiccaro cakuruk thomiccaro nthongarot thoili.

²¹ Oun oPoluc akkokurrinet non thomicco enthi nukun win.

²² Okkwi ipakorronno ongat Ili akwattattako. Ili a'rik.

²³ Athoporot thoili oleccuo oka nanon.

²⁴ Athongat thin oka nanon appik ngk'ran koMiccie oleccuo. Amin.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 8 Feb 2022

b9cb69ce-3694-5d9f-bda5-4a2243fae000